

四庫全書

史部

欽定四庫全書

欽定續通志卷二

唐紀二

太宗

太宗皇帝諱世民高祖次子也母曰太穆順聖皇后竇氏生而不驚方四歲有書生自言善相謁高祖曰公貴人也然必有貴子及見太宗曰龍鳳之姿天日之表其年及冠必能濟世安民高祖因採其語名之曰世民大

葉中突厥圍煬帝於鴈門煬帝以木繁詔書投汾水而  
下募兵赴援太宗時年十六往應募隸屯衛將軍雲定  
興謂定興曰突厥敢圍吾天子者以為無援故也今宜  
先後吾軍為數十里晝則幟旗相續夜則鉦鼓相應彼  
必謂救兵雲集則可不擊而走之不然彼衆我寡使悉  
軍來戰勝負未可知也定興從之師至崞縣突厥候騎  
果馳告始畢曰救兵大至矣由是解圍而遁高祖擊魏  
刁兒深入賊陣太宗以輕騎突圍拔高祖於萬衆之中

又奮擊大破之時年十八太宗為人聰明英武臨機果斷不拘小節是時天下已亂盜賊蜂起太宗知隋必亡乃推財養士結納豪傑長孫順德劉宏基等皆因事亡命匿之與晉陽令劉文靜尤善文靜坐李密事繫獄太宗夜就獄中見之與圖大事時百姓避賊多入城城中數萬人文靜為今久知其豪傑因共部署計已定乃因裴寂告高祖高祖已起兵建大將軍府太宗乃率兵徇西河尅之拜右領軍大都督右三軍皆隸焉封煬煌郡公

大軍西上將至霍邑隋將宋老生率精兵二萬屯霍邑會久雨糧盡高祖與裴寂議且還太原以圖後舉太宗曰本興大義以救蒼生宜直入咸陽號令天下今還守一城之地此為賊耳何以自全高祖不納促令引發太宗哭於軍門高祖大驚召問之對曰還則衆散於前敵乘於後死亡須臾是以悲耳高祖乃曰起事者汝也今成敗惟汝時左軍已先返即與隴西公建成分追之夜半太宗失道入山谷間棄其馬步而及左軍與俱還

高祖乃將而前遲明至霍邑宋老生不出太宗從數騎傳其城舉鞭指麾若將圍之者老生怒出兵背城而陣高祖與建成合陣於城東太宗及柴紹陣於城南老生麾兵疾進先薄高祖而建成墜馬老生乘之高祖與建成軍咸却太宗自南原馳下峻坂斷其軍為二而出其陣後老生敗走遂斬之進至河東關中豪傑爭走赴義太宗請進師入關取永豐倉粟以振窮乏收羣盜以圖京師高祖稱善太宗以前軍濟河先定渭北三輔吏民

及諸豪猾詣軍門請自効者日以千計扶老攜幼滿於  
麾下收納英俊以備僚列遠近聞者咸自託焉師次於  
涇陽擊胡賊劉鷄子破之大軍攻長安太宗屯金城坊  
攻其西北遂克之高祖輔政為光祿大夫唐國內史改  
封秦國公薛舉攻扶風太宗擊敗之追斬萬餘級遂略  
地於隴坻義寧元年十二月為右元帥總兵十萬攻東  
都及將旋師設三伏於三王陵敗隋將段達兵萬餘人  
因於宜陽新安置熊毅二州戍之而還徙封趙國公高

祖受禪為尚書令右武侯大將軍進封秦王加授雍州

牧薛舉寇涇州太宗為西討元帥屯於高塘城

殷開山傳作折塘薛

舉及仁果傳作

高塘吳鎮曰

高塘

折塘皆城名

高塘屬

寧州安平縣

折塘

屬涇州

安定縣

地既近而名相類故

易於舛誤

折塘

癰杜佑作折塘

已而舉死其子仁果率其眾求戰太宗

按兵不動久之仁果糧盡其將牟君才梁胡郎來降太

宗曰可矣乃遣行軍總管梁寶柵淺水原以誘之仁果

將宗羅睺併軍擊實太宗遣將軍龐玉救之玉軍幾不

能支太宗率兵出其後奮擊之羅睺敗走太宗率左右



二千餘騎追奔直趣其城已而大軍繼至四面圍之仁

果乃出降師還高祖令李密馳傳勞之於幽州密見太

宗不敢仰視退而歎曰真英主也凱旋獻捷於太廟拜

太尉使持節陝東道大行臺尚書令鎮長春宮關東兵

馬並受節度尋加左武侯大將軍涼州總管是時劉武

周據并州宋金剛陷滄州

新書作滄州舊書作滄州吳  
續曰地理志滄州本絳州冀

城縣武德元年置四年廢時劉武周方作亂河東絳滄  
正其境也若滄州則太遠矣劉武周獨微懷恩尉遲

敬德傳俱  
作滄州

王行本據蒲州而呂崇茂反於夏縣高祖懼

詔諸將棄河東以守關西

新書作關中誤今依舊書改正  
朔三省曰關西謂蒲津

關西也

太宗以為不可表言太原王業所基國之根本河

東殷實京邑所資若舉而棄之臣竊憤恨願假精兵三萬必可破賊高祖於是悉發關中兵以益之武德二年

十一月太宗率衆趣龍門關履冰而渡進屯柏壁與賊

將宋金剛相持而永安王孝基敗於夏縣太宗遣殷開

山秦叔寶邀賊於美良川大破之悉虜其衆復歸柏壁

於是諸將咸請戰太宗曰金剛懸軍深入精兵驍將皆

在於此武周據太原倚金剛為捍蔽軍無蓄積利在速戰我閉營蓄銳以挫其鋒糧盡計窮自當遁走三年二月金剛果以衆餒而遁太宗追之一日夜馳至二百里宿於雀鼠谷之西原軍士皆饑太宗不食者二日行至涪州乃得食而金剛將尉遲敬德尋相等皆來降劉武周懼奔於突厥於是并汾悉平高祖遣使即軍中拜太宗益州道行臺尚書令七月總率諸軍攻王世充於洛邑師次穀州世充率精兵三萬陣於慈澗太宗以輕騎

挑之時衆寡不敵陷於重圍左右咸懼太宗命左右先  
歸獨留後殿世充驍將軍雄信以數百騎夾道來逼  
幾為所敗太宗左右射之無不應弦而倒獲其大將燕  
頤世充乃拔慈澗之鎮歸於東都太宗遣行軍總管史  
萬寶自宜陽南據龍門劉德威自太行東圍河內王君  
廓自洛口斷其餉道又遣黃君漢夜從孝水下舟師襲  
迴洛城尅之黃河以南莫不響應城堡相次來降大軍  
進屯邙山九月太宗以五百騎先觀戰地卒與世充萬

餘人相遇會戰復破之斬首三千餘級獲大將陳智畧  
世充僅以身免其所署筠州總管楊慶馳使請降遣李  
世勣率師出轅轅道安撫其衆蒙汴洧豫等州相繼求降  
世充乃求救於竇建德四年二月竇建德以兵十餘萬  
援世充至於酸棗蕭瑀屈突通封德彝皆以腹背受敵  
恐非萬全請退師穀州以觀之太宗曰世充糧盡內外  
離心我當不勞攻擊坐收其敝建德新破孟海公將驕  
卒隋吾當進據虎牢扼其襟要賊若冒險與我爭鋒破

之必矣如其不戰旬日間世充當自潰若不速進賊入  
虎牢諸城新附必不能守二賊併力將若之何通又請  
解圍就險以候其變太宗不許於是留通輔齊王元吉  
以圍世充親率步騎三千五百人趣虎牢建德自滎陽  
西上築壘於板渚太宗屯虎牢相持二十餘日諜者曰  
建德伺官軍芻盡牧馬河北因將襲虎牢太宗知其謀  
遂牧馬河北以誘之詰朝建德果悉衆而至陳兵汜水  
世充將郭士衡陣於其南綿亘數里諸將大懼太宗將

數騎升高丘以望之謂諸將曰賊起山東未見大敵今  
度險而囂是無政令逼城而陣有輕我心我按兵不出  
彼廼氣衰陣久卒饑必將自退追而擊之無不克矣吾  
與公等約必以午時後破之建德列陣自辰至午兵士  
饑倦皆坐列又爭飲水遂巡斂退太宗曰可擊矣親率  
輕騎追而誘之衆繼至建德迴師而陣未及整列太宗  
先登擊之所向皆靡俄而衆軍合戰囂塵四起太宗率  
史大奈程璠金秦叔寶宇文歆等揮幡而入突出其陣

後張唐旗幟建德將士顧見之大潰追奔三十里斬首  
三千餘級虜其衆五萬生擒建德於陣乃將建德至洛  
陽城下以示世充世充大懼率其官屬二千餘人詣軍  
門請降山東悉平太宗入據宮城令蕭瑀竇軌等封守  
府庫一無所取令記室房玄齡收隋圖籍於是誅其同  
惡段達等五十餘人枉被囚禁者悉釋之非罪誅戮者  
祭而誅之大饗將士班賜有差高祖令尚書左僕射裴  
寂勞於軍中六月凱旋太宗披金甲陳鐵騎一萬甲士



三萬人前後部鼓吹俘二僞主及隋氏乘輿御物獻於太廟高祖大悅行飲至禮以享焉高祖以太宗功高古官號不足以稱乃加號天策上將領司徒陝東道大行臺尚書令位在王公上增邑二萬戶通前三萬戶賜金輅一乘袞冕之服白璧一雙黃金六千斤前後部鼓吹及九部之樂班劍四十人於時海內漸平太宗乃銳意經籍開文學館以待四方之士以行臺司勳郎中杜如晦等十有八人為學士更直閣下與之討論經義或夜

分而罷五年正月討劉黑闥於洺州敗之黑闥走突厥  
悉虜其衆時徐圓朗阻兵徐充廻師討平之於是河濟  
江淮諸郡邑皆平十月加左右十二衛大將軍七年突  
厥寇邊太宗與遇於幽州從百騎與其可汗語乃盟而  
去八年進位中書令初高祖起太原非其本意而事出  
太宗及取天下破宋金剛王世充竇建德等太宗功益  
高而高祖屢許以為太子太子建成懼廢與齊王元吉  
謀害太宗未發九年六月太宗以兵入玄武門殺太子

建成及齊王元吉

謹按通鑑輯覽

御批玄武門之事昔人聚訟紛紛惟我聖祖斷以高祖不能早定大計優游致禍太宗不能善全骨肉

相殘固由其謀之未臧匪獨其所遭之不幸為萬世不利定論書曰一人元良萬邦以貞高祖既不早見及此傳曰行一不義聖人不為太宗亦豈能無深疾斯言也哉高祖大驚乃以太宗為皇太子

八月癸亥高祖傳位於皇太子甲子太宗即皇帝位於東宮顯德殿遣裴寂告於南郊大赦武德以來流人還之賜文武官勲爵免關內及蒲芮虞秦陝鼎六州二歲租給復天下一年癸酉放掖庭宮女三千餘人甲戌突

厥寇涇州乙亥進寇武功丙子立妃長孫氏為皇后己  
卯突厥寇高陵癸未進至便橋乙酉及突厥頡利盟於  
便橋九月壬子禁私家妖神淫祀占卜非龜易五兆者

冬十月丙辰朔日有食之癸亥立中山郡王承乾為皇  
太子庚辰蕭瑀陳叔達罷十一月庚寅降宗室郡王非

有功者爵為公

按舊書淮安王神通傳云於時宗室率以屬既降爵為郡公新舊書本紀俱作

縣公者誤也今據吳縝糾謬刪縣字

十二月癸酉慮囚是歲進封子長沙

郡王恪為漢王宜陽郡王祐楚王

貞觀元年春正月乙酉改元辛丑燕郡王李藝反於涇  
州伏誅三月癸巳皇后親蠶丙午詔齊僕射崔季舒黃  
門侍郎郭遵尚書右丞封孝琰以極言蒙難季舒剛  
遵子雲孝琰子君遵並及淫刑宜免內侍量才別叙閏  
月癸丑朔日有食之夏四月癸巳涼州都督長樂郡王  
幼良有罪伏誅五月癸丑敕中書令侍中朝堂受訟辭  
有陳事者悉上封六月辛丑封德彝薨甲辰太子少師  
蕭瑀為尚書左僕射是夏山東旱免今歲租秋七月壬

子吏部尚書長孫無忌為尚書右僕射八月宇文士及  
檢校涼州都督戊戌貶高士廉為安州大都督九月庚  
戌朔日有食之辛酉遣使諸州行損田賑問下戶御史  
大夫杜淹檢校吏部尚書參議朝政宇文士及罷辛未  
幽州都督王君廓奔於突厥冬十月丁酉以歲饑減膳  
十二月壬午蕭瑀罷戊申利州都督李孝常右武衛將  
軍劉德裕謀反伏誅

二年春正月辛亥長孫無忌罷兵部尚書杜如晦檢校

侍中總監東宮兵馬事癸丑吐谷渾寇岷州都督李道  
彥敗之丁巳徙封恪為蜀王泰越王祐燕王庚午刑部  
尚書李靖檢校中書令二月丙戌靺鞨內屬三月戊申  
朔日有食之壬子命中書門下五品以上及尚書議決  
死罪壬戌李靖為關內道行軍大總管以備薛延陀己  
巳遣使巡關內諸州出金寶贖饑民鬻子者還之庚午  
以旱蝗責躬大赦癸酉雨夏四月己卯瘞隋人暴骸初  
詔天下並置義倉壬寅朔方人梁洛仁殺梁師都以降

六月庚寅子治生賜是日生子者粟辛卯辰州刺史裴  
虔通以弑隋煬帝削爵流驩州秋七月戊申萊州刺史  
牛方裕絳州刺史薛世良廣州長史唐奉義虎牙郎將  
高元禮以宇文化及之黨皆除名徙邊八月甲戌省冤  
獄於朝堂辛丑立二王後是月河南河北大霜人饑九  
月丁未簡出掖庭宮人前後所出三千餘人

謹按通鑑  
輯覽

御批太宗即位已放宮女三千矣今又放三千果爾其淹留  
永巷者又復何限白居易詩怨女三千放出宮乃詞臣掄  
揚溢美之言唐史不知其失實而書之此不足  
以美太宗而適足以誣太宗耳何可為訓冬十月庚辰



杜淹薨戊子殺瀛州刺史盧祖尚十一月辛酉有事於南郊十二月壬辰黃門侍郎王珪守侍中

三年春正月丙午以旱避正殿戊午享於太廟癸亥耕藉田辛未裴寂罷二月戊寅房玄齡為尚書左僕射杜如晦為右僕射尚書右丞魏徵為秘書監參議朝政三月己酉慮囚夏四月乙亥太上皇徙居於太安宮甲午始御太極殿戊戌賜孝義之家粟五斛八十以上二斛九十以上三斛百歲加絹二匹六月戊寅以旱慮囚遣

使慰撫關內諸州壬午詔文武官言事秋八月己巳朔  
日有食之丁亥李靖為定襄道行軍大總管九月丁巳  
華州刺史柴紹為勝州道行軍總管冬十一月庚申并  
州都督李世勣為通漠道行軍總管華州刺史柴紹為  
金河道行軍總管任城王道宗為大同道行軍總管幽  
州都督衛孝節為恒安道行軍總管營州都督薛萬淑  
為暢武道行軍總管以伐突厥十二月癸未杜如晦罷  
閏月癸丑為死兵者立浮屠祠辛酉慮囚是歲中國人

歸自塞外及開四夷為州縣者百二十餘萬人

四年春正月丁卯朔日有食之二月己亥幸溫湯甲辰  
李靖及突厥戰於陰山敗之丙午至自溫湯甲寅大赦  
賜酺五日御史大夫溫彥博為中書令王珪為侍中民  
部尚書戴胄檢校吏部尚書參豫朝政太常卿蕭瑀為  
御史大夫與宰臣參議朝政丁巳以旱詔公卿言事三  
月甲申杜如晦薨甲午李靖俘突厥頡利可汗以獻夏  
四月戊戌西北君長請上號為天可汗六月乙卯發卒

治洛陽宮秋七月甲子朔日有食之癸酉蕭瑀罷甲戌  
太上皇不豫廢朝辛卯疾愈賜都督刺史文武官及民  
年八十以上孝子表門閭者有差八月甲寅李靖為尚  
書右僕射九月庚午瘞長城南隋人暴骨己卯如隴州  
壬午禁芻牧於古明君賢臣烈士之墓者冬十月壬辰  
赦岐隴二州免今歲租賦降咸陽始平武功死罪以下  
辛卯獵於貴泉谷甲辰獵於魚龍川乙卯免武功今歲  
租賦十一月壬戌右衛大將軍侯君集為兵部尚書參

議朝政甲子至自隴州戊寅除鞭背刑十二月甲辰獵於鹿苑乙巳至自鹿苑辛亥淮安王神通薨是歲天下斷死罪者二十九人

五年春正月癸酉獵於昆明池丙子至自昆明池癸未朝集使請封禪不許二月己酉封弟元裕為鄆王元名譙王靈夔魏王元祥許王元曉密王庚戌封子惜為梁王貞漢王惲郢王治晉王慎申王囂江王簡代王夏四月以金帛贖還中國人沒突厥者秋八月甲辰遣使詣

高麗祭隋人戰亡者戊申殺大理丞張蘊古冬十一月  
丙子有事於南郊十二月丁亥詔決死刑京師五覆奏  
諸州三覆奏其日尚食毋進酒肉壬寅幸溫湯癸卯獵  
於驪山賜新豐高年帛戊申至自溫湯癸丑赦關內

六年春正月乙卯朔日有食之癸酉靜州山獠反右武  
衛將軍李子和敗之三月侯君集罷戊辰如九成宮丁  
丑降雍岐豳三州死罪以下賜民八十以上粟帛夏五  
月魏徵檢校侍中秋七月己巳詔天下行鄉飲酒九月

己酉幸慶善宮冬十月侯君集起復乙卯至自慶善宮  
十二月辛未慮囚縱死罪者歸其家仍敕天下死囚皆  
縱遣使至期來詣京師是歲諸羌內屬者三十萬人

七年春正月戊子斥宇文化及黨人之子孫勿齒辛丑  
賜京城酺三日二月丁卯雨土三月戊子王珪罷庚寅  
魏徵為侍中癸巳直太史李淳風鑄渾天黃道儀夏五  
月癸未如九成宮六月辛亥戴胄薨秋八月辛未東西  
洞獠寇邊右屯衛大將軍張士貴為龔州道行軍總管

以討之以山東河南大水遣使賑之九月縱囚來歸凡

三百人皆赦之

謹按

御製讀歐陽修縱囚論太宗好名之事不一而足而莫過於縱囚之特甚太宗多術人也意彼時必有以密示司理期三百人以必來而必免苟其不來必大索天下而誅之且及其父母妻子夫三百人者原在此域中也其敢不來以冀倖免而不來以累及其父母妻子乎史官無識未求其詳而載之反以為盛德之感有識者觀之實不值一噓之為戲耳而歐陽氏猶以為可偶一為之予以為即偶一為之亦不可

冬十月庚申至自九成

宮十一月丁丑頒新定五經壬辰開府儀同三司長孫

無忌為司空十二月甲寅幸芙蓉園丙辰獵於少陵原



戊午至自少陵原

八年春正月辛丑張士貴及獠戰敗之壬寅遣使循省  
天下二月乙巳皇太子加元服丙午降死罪以下賜五  
品以上子為父後者爵一級民酺三日三月庚辰如九  
成宮夏五月辛未朔日有食之吐谷渾寇涼州六月左  
驍衛大將軍段志玄為西海道行軍總管左驍衛將軍  
樊興為赤水道行軍總管以伐之秋七月山東河南淮  
南大水遣使賑恤冬十月作永安宮辛丑段志玄擊吐

谷渾大破之甲子至自九成宮十一月辛未李靖罷己丑吐谷渾寇涼州執行人鴻臚丞趙德楷十二月辛丑特進李靖為西海道行軍大總管侯君集為積石道行

軍總管任城王道宗為鄯善道行軍總管膠東公道彥

為赤水道行軍總管涼州都督李大亮為且末道行軍總管利州刺史高甌生為鹽澤道行軍總管以伐吐谷

渾

吐谷渾傳在九年  
新舊紀俱在八年

丁卯從太上皇閱武於城西

九年春正月党項羌叛二月長孫無忌罷三月庚辰洮

欽定四庫全書

欽定續通志

卷二

十七

州羌殺刺史孔長秀附於吐谷渾壬午大赦乙酉高甌

生及羌人戰敗之夏閏四月丙寅

舊書作丁卯

朔日有食之

任城王道宗敗吐谷渾於庫山五月長孫無忌起復庚

子太上皇崩皇太子聽政壬子李靖及吐谷渾戰大敗

之秋七月庚子鹽澤道行軍副總管劉德敏及羌人戰

敗之冬十月庚寅葬高祖皇帝於獻陵十一月壬戌特

進蕭瑀參豫朝政

十年春正月甲午帝復親聽政壬子左僕射房玄齡侍

中魏徵上梁陳齊周隋五代史癸丑徙封元景為荆王

元昌漢王元禮徐王元嘉韓王

元嘉傳貞觀九年徙封韓

元則彭王

元懿鄭王元軌霍王元鳳虢王元慶道王靈夔燕王恪

吳王泰魏王祐齊王愔蜀王惲蔣王貞越王慎紀王三

月癸丑出諸王為都督夏六月壬申溫彥博為尚書右

僕射太常卿楊師道為侍中魏徵罷為特進知門下省

事參議朝章國典己卯皇后崩冬十一月庚寅

通鑑作庚午考

舊書次年正月丁亥朔則此當作庚寅為是

癸文德皇后於昭陵十二月蕭

瑀罷庚辰慮囚

十一年春正月丁亥徙封元裕為鄧王元名舒王庚子

頒新律令於天下作飛仙宮

舊書仙作山下同

甲寅房玄齡進

所修五禮乙卯免雍州今歲租賦二月丁巳營九峻山

為陵賜功臣密戚陪塋地及秘器甲子如洛陽宮乙丑

給民百歲以上侍五人壬午獵於鹿臺嶺三月丙戌朔

日有食之癸卯降洛州囚見徒免一歲租調辛亥獵於廣

成澤癸丑如洛陽宮夏六月甲寅溫彥博薨丁巳幸明

德宮己未以諸王為世封刺史

謹按通鑑輯覽

御批唐室之衰由方鎮跋扈不制得自專世襲故耳太宗令元景等世襲刺史雖行之踰年旋即停罷然已有以開其

端矣

戊辰以功臣為世封刺史己巳徙封元祥為江王秋七

月癸未大雨水穀洛溢乙未詔百官言事丁酉還洛陽

宮壬寅廢明德宮及飛仙宮之玄圃院給遭水者丙午

給亳州老子廟兗州孔子廟戶各二十以奉享復涼武

昭王近墓戶二十以守衛九月丁亥河溢壞陝州河北

縣毀河陽中渾幸白司馬坂以觀之賜瀕河遭水家粟

帛冬十月癸丑賜先朝謀臣武將及親戚亡者瑩陪獻陵十一月辛卯如懷州乙未獵於濟源麥山丙午還洛陽宮以故荊州都督武士驥女為才人

十二年春正月乙未吏部尚書高士廉等上氏族志二月乙卯發洛陽宮癸亥如河北縣觀底柱甲子巫州獠反夔州都督齊善行敗之乙丑次陝州丁卯至柳谷觀鹽池庚午至蒲州甲戌如長春宮免朝邑今歲租賦降囚罪乙亥獵於河濱戊寅贈隋堯君素蒲州刺史閏月

庚辰朔日有食之丙戌至自洛陽宮秋七月癸酉高士  
廉為尚書右僕射八月壬寅吐蕃寇松州侯君集為當  
彌道行軍大總管率三總管兵以伐之九月辛亥闕水  
道行軍總管牛進達及吐蕃戰於松州敗之冬十月己  
卯獵於始平賜高年粟帛乙未至自始平釣州山獠反  
桂州都督張寶德敗之十一月己巳明州山獠反交州  
都督李道彥敗之十二月辛巳壁州山獠反右武侯將  
軍上官懷仁討之



十三年春正月乙巳謁獻陵赦三原縣及行從大辟罪免縣人今歲租賦丁未至自獻陵王珪薨二月丙子

新書

作庚子

停世封刺史夏四月戊寅如九成宮甲申中郎將

阿史那結社率反伏誅五月甲寅以旱避正殿詔五品

以上言事減膳罷役理囚賑乏乃雨六月丙申封弟元

嬰為滕王秋八月辛未朔日有食之冬十月甲申至自

九成宮十一月辛亥楊師道為中書令戊辰尚書左丞

劉洎為黃門侍郎參知政事十二月壬申侯君集為交

河道行軍大總管以伐高昌乙亥封子福為趙王壬辰  
獵於咸陽癸巳至自咸陽詔洛相幽徐齊并秦蒲等州  
並置常平倉

十四年春正月庚子有司讀時令甲寅幸魏王泰第赦  
雍州長安縣免延康里今歲租賦二月丁丑親釋奠於  
國學賜學官高第生帛赦大理萬年縣繫囚壬午幸溫  
湯辛卯至自溫湯乙未詔求梁皇侶褚仲都周熊安生  
沈重陳沈文阿周弘正張機隋何妥劉焯劉炫之後三

月羅賓二州獠反廣州總管党仁弘敗之夏五月壬寅  
徙封靈夔為魯王秋八月庚午作襄城宮癸酉侯君集  
克高昌以其地為西州置安西都護府九月癸卯赦高  
昌部及士卒父子犯死暮犯流大功犯徒小功總麻犯  
杖皆原之冬閏十月乙未如同州甲辰獵於堯山庚戌  
至自同州十一月甲子有事於南郊十二月丁酉侯君  
集俘高昌王以獻賜酺三日癸卯獵於樊川乙巳至自  
樊川

十五年春正月辛巳如洛陽宮次溫湯衛士崔卿刁文  
懿謀反伏誅三月戊辰如襄城宮庚午罷襄城宮分賜  
百姓夏四月辛卯詔以來歲二月有事於泰山乙未免  
洛州今歲租還戶故給復者加給一年賜民八十以上  
物惇獨鰥寡疾病不能自存者米二斛慮囚丙辰詔停  
封泰山避正殿減膳秋七月丙寅宿周隋名臣及忠烈  
子孫貞觀以後流配者冬十月辛卯獵於伊闕壬辰如  
洛陽宮十一月癸酉薛延陀寇邊兵部尚書李世勣為

朔州道行軍總管右衛大將軍李大亮為靈州道行軍  
總管涼州都督李襲譽為涼州道行軍總管以伐之十  
二月戊子至自洛陽官庾子命三品以上嫡子事東宮  
辛丑慮囚甲辰李世勣及薛延陀戰於諾真水敗之乙  
巳贈戰亡將士官三轉

十六年春正月乙丑遣使安撫西州戊辰募戍西州者  
前犯流死亡匿聽自首以應募辛未徙天下死罪囚實  
西州中書舍人岑文本為中書侍郎專典機密夏六月

辛卯詔復隱王建成曰隱太子改封海陵刺王元吉曰  
巢刺王秋七月戊午長孫無忌為司徒房玄齡為司空  
冬十一月丙辰獵於武功辛酉使祭隋文帝陵壬戌獵  
於岐山之陽甲子賜所過六縣高年孤疾糴食粟帛遂  
幸慶善宮庚午至自慶善宮十二月癸卯幸溫湯甲辰  
獵於驪山乙巳至自溫湯

十七年春正月戊辰魏徵薨代州都督劉蘭謀反伏誅  
二月己亥慮囚戊申圖功臣於凌煙閣三月壬子禁選

終違令式者丙辰齊王祐反李世勣討之甲子以旱遣使覆囚決獄乙丑齊王祐伏誅給復齊州一年夏四月乙酉廢皇太子為庶人漢王元昌侯君集等伏誅丙戌立晉王治為皇太子大赦賜文武官及五品以上子為父後者爵一級民八十以上粟帛酺三日丁亥楊師道罷己丑特進蕭瑀為太子太保李世勣為太子詹事同中書門下三品庚寅謝承乾之過於太廟癸巳降封魏王泰為東萊郡王六月己卯朔日有食之壬辰

舊書作壬午

改葬隋恭帝甲午以旱避正殿減膳詔京官五品以上  
言事丁酉高士廉同中書門下三品平章政事閏月丁  
巳詔皇太子曲左右屯營兵丙子徙封泰為順陽郡王  
秋七月丁酉房玄齡罷八月庚戌工部尚書張亮為刑  
部尚書參豫朝政冬十月丁未建諸州邸於京城丁巳  
房玄齡起復十一月己卯有事於南郊壬午賜酺三日  
以涼州獲瑞石曲赦涼州并慮京城及諸州繫囚多所  
原宥十二月庚申幸溫湯庚午至自溫湯



十八年春正月乙未如鍾官城庚子如郭壬寅幸溫湯  
二月己酉如零口乙卯至自零口丁巳給復突厥高昌  
部人隸諸州者二年夏四月辛亥如九成宮秋七月甲  
午營州都督張儉率幽營兵及契丹奚以伐高麗八月  
壬子安西都護郭孝恪為西州道行軍總管以伐焉耆  
甲子至自九成宮丁卯劉洎為侍中岑文本為中書令  
中書侍郎馬周守中書令九月黃門侍郎褚遂良參豫  
朝政辛卯郭孝恪及焉耆戰敗之執其王突騎支送行

在所冬十月辛丑朔日有食之癸卯宴雍州父老於上  
林苑賜粟帛甲寅如洛陽官己巳獵於天池十一月戊  
寅慮囚庚辰遣使巡問鄭汝懷澤四州高年宴賜之甲

午張亮為平壤道行軍大總管李世勣馬周為遼東道

行軍大總管

李世勣馬周為行軍大總管宰相表誤作十一月甲子以十月辛丑朔推之十一月

不應有甲子也

率十六總管兵以伐高麗十二月壬寅庶人承

乾卒

常山王承乾傳云卒於貞觀十九年

戊午李思摩部落叛

十九年春正月庚戌帝自將諸軍發洛陽以伐高麗癸

丑射虎於武德北山乙卯詔皇太子監國於定州申國  
公高士廉攝太子太傅與侍中劉洎中書令馬周太子  
少詹事張行成右庶子高季輔五人同掌機務丁巳賜  
所過高年鰥寡粟帛贈比干太師諡忠烈三月丁丑次  
定州壬辰車駕發定州長孫無忌攝侍中吏部尚書楊  
師道攝中書令夏四月癸卯誓師於幽州大饗軍丁未  
岑文本薨癸亥李世勣克蓋牟城五月己巳平壤道行  
軍總管程名振克沙卑城庚午次遼澤瘞隋人戰亡者

乙亥遼東道行軍總管張君又有罪伏誅丁丑車駕渡  
遼水軍於馬首山甲申克遼東城六月丁酉克白巖城  
己未大敗高麗於安市城東南山左武衛將軍王君惲死  
之辛酉賜酺三日秋七月壬申葵死事官加爵四級以  
一子襲九月癸未班師冬十月丙午次營州以太牢祭  
死事者丙辰皇太子迎謁於臨渝關戊午次漢武臺刻  
石紀功十一月癸酉大饗軍於幽州癸未平壤道行軍  
總管張文幹有罪伏誅丙戌次定州丁亥貶楊師道為

工部尚書十二月戊申次并州己未薛延陀寇夏州左  
領軍大將軍執失思力敗之庚申殺劉洎

二十年春正月辛未夏州都督喬師望及薛延陀戰敗  
之丁丑遣使二十二人以六條黜陟於天下庚辰赦并  
州起義時編戶給復三年後附者一年二月甲午從伐  
高麗無功者皆賜勲一轉乙未發并州庚申賜所過高  
年鰥寡粟三月己巳至自高麗庚午不豫皇太子聽政  
己丑張亮謀反伏誅閏月癸巳朔日有食之夏六月乙

亥江夏郡王道宗李世勣伐薛延陀秋七月辛亥疾愈  
李世勣及薛延陀戰敗之八月甲子封孫忠為陳王己  
巳如靈州庚辰次涇州賜高年鰥寡粟帛丙戌踰隴山  
關次瓦亭觀牧馬丁亥許陪陵者子孫從葬九月辛卯  
遣使巡察嶺南甲辰鐵勒諸部請上號為可汗冬十月  
貶蕭瑀為商州刺史丙戌至自靈州十一月己丑詔祭  
祀表疏藩客兵馬宿衛行魚契給驛授五品以上官及  
除解決死罪皆以聞餘並取皇太子處分

二十一年春正月壬辰高士廉薨丁酉詔以來歲二月  
有事於泰山甲寅以鐵勒諸部為州縣賜京師酺三日  
慮因降死罪以下二月丁丑皇太子釋菜於太學三月  
戊子左武衛大將軍牛進達為青丘道行軍大總管李  
世勣為遼東道行軍大總管率三總管兵以伐高麗夏  
四月乙丑作翠微宮五月戊子幸翠微宮壬辰命百司  
決事於皇太子庚戌李世勣克南蘇木底城六月丁丑  
遣使於鐵勒諸部購中國人陷沒者秋七月乙未牛進

達克石城丙申作玉華宮庚戌至自翠微宮八月壬戌  
詔以河北大水停封泰山九月丁酉封子明為曹王冬  
十月癸丑褚遂良罷十一月癸卯進封泰為濮王十二  
月戊寅左驍衛大將軍契苾何力為崑丘道行軍大總  
管率三總管兵以伐龜茲

二十二年春正月庚寅馬周薨戊戌幸溫湯己亥中書

舍人崔仁師為中書侍郎參知機務丙午右

新書作左  
今據薛萬

徹及高麗  
傳改正

武衛大將軍薛萬徹為青丘道行軍大總管



以伐高麗長孫無忌檢校中書令知尚書門下省事戊申至自溫湯二月褚遂良起復乙卯見京城父老勞之  
蠲今歲半租畿縣三之一丁卯詔度遼水有功未酬勲  
而犯罪者與成官同乙亥幸玉華宮己卯獵於華原崔  
仁師除名流連州三月丁亥赦宜君給復縣人自玉華  
宮苑中遷者三年夏四月丁巳松州蠻叛右武侯將軍  
梁建方敗之六月丙寅遣張行成存問河北從軍者家  
令州縣為營農癸酉蕭瑀薨丙子薛萬徹及高麗戰於

泊灼城

新紀及高麗傳皆云泊灼城而薛萬徹傳作泊灼吳鎮曰地理志載買耽考遼州入四夷之路

營州西北路有泊灼城登州東北路有泊灼口似泊灼是也

敗之秋七月壬辰殺華

州刺史李君羨癸卯房玄齡薨八月己酉朔日有食之

辛未執失思力伐薛延陀餘部於金山九月庚辰崑丘

道行軍總管阿史那社尒及薛延陀餘部處月處蜜戰

敗之己亥褚遂良為中書令壬寅眉邛雅三州獠反茂

州都督張士貴討之冬十月癸丑至自玉華宮己巳阿

史那社尒及龜茲戰敗之十二月辛未降長安萬年徒

罪以下閏月癸巳慮囚

二十三年春正月辛亥阿史那社尒俘龜茲王以獻三月己未自去冬旱至是始雨辛酉大赦丁卯不豫命皇太子聽政於金液門夏四月己亥幸翠微宮五月戊午

貶李世勣為疊州都督己巳皇帝崩於含風殿年五十

二

新書作五十三考太宗生於隋開皇十八年戊午至是年己酉得五十二年今據舊書作二

庚午

奉大行御馬輿還京師禮部尚書于志寧為侍中太子

少詹事張行成兼侍中高季輔兼中書令壬申發喪諡

曰文廟號太宗陵曰昭陵上元元年改諡文武聖皇帝  
天寶八載諡文武大聖皇帝十三載增諡文武大聖大  
廣孝皇帝

太宗貞觀二十三年

欽定續通志卷二

欽定四庫全書

欽定續通志卷三

唐紀三

高宗

高宗皇帝諱治太宗第九子也母曰文德皇后長孫氏  
始封晉王貞觀七年遙領并州都督尋拜右武侯大將  
軍十七年太子承乾廢而魏王泰次當立亦以罪黜乃  
立晉王為皇太子太宗嘗命皇太子遊觀習射太子辭

以非所好願得奉至尊居膝下太宗大喜乃營寢殿側  
為別院使太子居之太宗每視朝皇太子常侍觀決庶  
政或令參議太宗數稱其善二十三年太宗有疾詔皇  
太子聽政於金液門四月從幸翠微宮太宗崩以羽檄  
發六府甲士四千衛皇太子入于京師六月甲戌即皇  
帝位于樞前大赦賜文武官勲一轉民八十以上粟帛  
給復雍州及比歲供軍所一年癸未長孫無忌為太尉  
癸巳檢校洛州刺史李勣為開府儀同三司參掌機密

秋八月庚辰遣使存問河東給復二年庚寅葬太宗皇帝於昭陵九月甲寅荆王元景為司徒吳王恪為司空乙卯李勣為尚書左僕射同中書門下三品冬十一月左翊衛郎將高侃伐突厥

永徽元年春正月辛丑朔改元丙午立妃王氏為皇后張行成為侍中二月辛卯封子孝為許王上金杞王素節雍王夏六月高侃及突厥戰於金山敗之庚辰詔五品以上言事秋七月辛酉以旱慮囚八月戊辰給五品



以上解官充侍者半祿加賜帛庚午降死罪以下九月  
癸卯高保倖突厥車鼻可汗獻於昭陵冬十月戊辰李  
勣罷左僕射十一月己未貶褚遂良為同州刺史十二  
月庚午琰州獠寇邊梓州都督謝萬歲死之

胡三省曰梓州當作

州是歲雍絳同等九州旱蝗齊定等十六州水

二年春正月戊戌詔遭蟲水處發義倉賑之雍同二州  
各遣使存問乙巳黃門侍郎宇文節中書侍郎柳奭同  
中書門下三品乙卯瑤池都督阿史那賀魯叛夏六月

辛酉襄邑王神策薨秋七月丁未賀魯寇庭州左武衛  
大將軍梁建方右驍衛大將軍契苾何力為月弓道行  
軍總管以伐之八月己巳高季輔為侍中于志寧為尚  
書左僕射張行成為右僕射同中書門下三品己卯白  
水蠻寇邊左領軍將軍趙孝祖為郎州道行軍總管以  
伐之九月癸卯以同州苦泉牧地賜貧民閏月辛未頒  
新定律例格式冬十一月辛酉有事於南郊癸酉禁進  
犬馬鷹鵠是月賓州義州蠻寇邊桂州都督劉伯英敗

之趙孝祖及白水蠻戰於羅仵候山敗之十二月壬子處月朱邪孤注殺招慰使單道惠叛附於賀魯

三年春正月癸亥梁建方及處月戰於牢山敗之甲子以旱避正殿減膳降囚罪徒以下原之己巳褚遂良為吏部尚書同中書門下三品丙子享於太廟丁亥耕藉田三月辛巳宇文節為侍中柳奭守中書令夏四月庚寅趙孝祖及白水蠻戰敗之是月兵部侍郎韓瑗為黃門侍郎同中書門下三品五月庚申求齊侍中崔李舒

給事黃門侍郎裴澤隋儀同三司豆盧毓御史中丞游  
楚客子孫官之秋七月丁巳立陳王忠為皇太子大赦  
賜五品以上子為父後者勲一轉民酺三日九月丙辰  
求周司沐大夫裴融尚書左丞封孝琰子孫官之是月  
中書侍郎來濟同中書門下三品冬十二月癸巳濮王  
泰薨

四年春二月甲申駙馬都尉房遺愛薛萬徹柴令武高  
陽巴陵公主謀反伏誅殺荆王元景吳王恪乙酉流宇

文節于桂州戊子廢蜀王愔為庶人已亥徐王元禮為司徒李勣為司空三月壬子頒五經正義每年明經令

依此考試夏四月壬寅以旱慮囚遣使決天下獄減殿中太僕馬粟詔文武官言事甲辰避正殿減膳秋九月

壬戌張行成薨

舊書壬戌作壬寅

甲戌褚遂良為尚書右僕射

冬十月庚子幸溫湯甲辰赦新豐乙巳至自溫湯戊申

睦州女子陳碩真反婺州刺史崔義立討之十一月庚

戌陳碩真伏誅癸丑兵部尚書崔敦禮為侍中丁巳柳

與為中書令十二月庚子高李輔薨

五年春正月丙寅以旱詔文武官朝集使言事三月戊  
午如萬年宮乙丑次鳳泉湯辛未赦岐州及所過徒罪  
以下夏六月癸亥柳奭罷秋八月己未詔免麟遊岐陽  
今歲課役岐州及供頓縣半歲九月丁酉至自萬年宮  
冬十月癸卯築京師羅郭起觀于九門

六年春正月壬申謁昭陵赦醴泉及行從免縣今歲租  
調陵所宿衛進爵一級令丞加一階癸酉以少牢祭陪

葬者甲戌至自昭陵庚寅封子弘為代王賢潞王二月  
乙巳皇太子加元服降死罪以下賜酺三日五品以上  
為父後者勲一轉乙丑營州都督程名振左衛中郎將  
蘇定方伐高麗夏五月壬午及高麗戰于貴端水敗之  
舊書在三月  
今從新書癸未左屯衛大將軍程知節為蔥山道行

軍大總管以伐賀魯壬辰韓瑗為侍中來濟為中書令  
秋七月乙酉崔敦禮為中書令是月中書舍人李義府  
為中書侍郎參知政事九月庚午貶褚遂良為潭州都

督乙酉洛水溢冬十月齊州黃河溢己酉廢皇后王氏

為庶人乙卯立昭儀武氏為皇后

新書作宸妃武氏考異曰立武后詔書猶

云昭儀武氏然則未嘗為宸妃也今從會要

丁巳大赦賜民八十以上粟帛

十一月己巳皇后見于太廟戊子停諸州貢珠癸巳詔

禁吏酷法及為隱名書者是冬皇后殺王庶人

顯慶元年春正月辛未廢皇太子為梁王立代王弘為

皇太子壬申大赦改元賜五品以上子為父後者勲一

轉民鬴三日八十以上粟帛二月辛亥贈武士護為司



徒封周國公三月辛巳皇后親蠶丙戌戶部侍郎杜正倫為黃門侍郎同中書門下三品夏四月壬寅詔五品以上老疾不以罪者同致仕壬子矩州人謝無零反伏

誅秋七月癸未崔敦禮為太子少師同中書門下三品

八月丙申崔敦禮薨辛丑程知節及賀魯部歌邏祿處

月戰于榆幕谷敗之

舊書作榆幕谷

九月庚辰括州海溢癸未

程知節及賀魯戰于恒篤城敗之

舊書作恒篤城

冬十一月乙

丑以子顯生賜京官朝集使勲一轉是歲龜茲大將羯

獵顛附于賀魯左屯衛大將軍楊胄伐之

二年春閏正月壬寅如洛陽宮庚戌右屯衛將軍蘇定  
方為伊麗道行軍總管以伐賀魯二月癸亥降洛州囚  
罪徒以下原之免民一歲租調賜百歲以上氈衾粟帛  
庚午封子顯為周王壬申徙封素節為郇王三月戊申  
禁舅姑拜公主父母拜王妃癸丑李義府兼中書令夏  
五月丙申幸明德宮始隔日視事秋七月丁亥還洛陽  
宮八月丁卯貶韓瑗為振州刺史來濟為台州刺史辛

未衛尉卿許敬宗為侍中九月庚寅杜正倫兼中書令

冬十一月

舊書此年十一月無事而以十一月之事俱係十月通鑑因之然鑑於十二月著乙卯朔

則十月中不應有戊戌甲辰乙巳壬戌戌如許州甲辰子等日自當從新書作十一月為是

遣使慮所過州縣囚乙巳獵于渰南壬子講武于新鄭

赦鄭州免一歲租賦賜八十以上粟帛其嘗事高祖任

佐史者以名聞十二月乙卯還洛陽宮丁巳蘇定方敗

賀魯於金牙山執之丁卯以洛陽宮為東都周王顯為

洛州牧

三年春正月戊子長孫無忌等修新禮成詔頒行之戊申楊胄及龜茲羯獵顛戰于泥師城大破之以其地為龜茲都督府二月甲戌至自東都戊寅慮囚夏六月壬子程名振及高麗戰于赤烽鎮敗之冬十一月乙酉貶杜正倫為橫州刺史李義府普州刺史戊子許敬宗權檢校中書令甲午蘇定方俘賀魯獻于昭陵戊戌許敬宗為中書令大理卿辛茂將兼侍中甲辰鄂國公尉遲敬德薨

四年春三月壬午岷陵都護阿史那彌射及西突厥真珠葉護戰于雙河敗之夏四月丙辰于志寧為太子太

師同中書門下三品乙丑黃門侍郎許圜師同中書門

下三品

舊書許圜師傳二年同中書門下三品新書宰相表亦在四年與紀同

戊辰流長

孫無忌于黔州于志寧罷

舊書罷于志寧在丙戌流長孫無忌在戊戌考上四月有

丙辰下五月有己卯則四月中不得有丙戌戊戌也此從新書

五月己卯許圜師為中

書侍郎同中書門下三品丙申兵部尚書任雅相度支

尚書盧承慶參知政事戊戌殺涼州都督長史趙持蒲

秋七月己丑以旱避正殿壬辰慮囚八月壬子李義府  
為吏部尚書同中書門下三品冬十月丙午皇太子加  
元服大赦賜五品以上子孫為父祖後者勲一轉民酺  
三日閏月戊寅如東都皇太子監國辛巳詔所過供頓  
免今歲租賦之半賜民八十以上氈衾粟帛十一月丙  
午許圜師為左散騎常侍檢校侍中戊午辛茂將薨癸  
亥賀魯部悉結闕俟斤都曼寇邊左驍衛大將軍蘇定  
方為安撫大使以伐之盧承慶同中書門下三品蘇定

方與都曼戰于馬頭川敗之都曼降

五年春正月癸卯蘇定方俘都曼以獻甲子如并州已  
巳次長平賜父老布帛二月丙戌赦并州及所過州縣  
令所司致祭義旗初嘗任五品以上葬并州者佐命功  
臣子孫及大將軍府僚佐以下今見存者賜階級有差  
民年八十以上版授刺史縣令賜酺三日甲午祠舊宅  
三月丙午皇后宴親族鄰里于朝堂會命婦于內殿賜  
從官五品以上并州長史司馬勲一轉婦人八十以上

版授郡君賜氍毹粟帛己酉講武于城西辛亥左武衛

大將軍蘇定方為神丘道行軍大總管

新書作神  
兵道下同

新羅

王金春秋為岵夷道行軍大總管率三將軍及新羅兵以  
伐百濟夏四月癸巳至東都五月辛丑作八闕宮戊辰

定襄都督阿史德樞賓為沙磧道行軍總管以伐契丹

六月庚午朔日有食之秋七月乙巳廢梁王忠為庶人

丁卯盧承慶罷八月庚辰蘇定方及百濟戰敗之百濟

王請降以其地置熊津都督府壬午左武衛大將軍鄭



仁泰及悉結拔也固僕骨同羅戰敗之癸未赦神丘道  
大總管以下軍士及其家賜民酺三日冬十月初令皇

后決百司奏事

謹按通鑑輯覽

御批壺內稍與外事尚不免司晨之索況盡委以政柄乎自  
來女寵為患雖褒姒不至若此之甚發明謂唐室之禍高  
宗自禍之立論誠當蓋自隔日視事以後積  
怠生疲遂至不振履霜堅冰其所由來漸矣十一月戊戌

蘇定方俘百濟王以獻甲寅如許州十二月辛未獵於  
安樂川己卯還東都壬午左驍衛大將軍契苾何力為  
涇江道行軍大總管蘇定方為遼東道行軍大總管左

驍衛將軍劉伯英為平壤道行軍大總管以伐高麗阿  
史德樞賓及奚契丹戰敗之

龍朔元年春正月乙卯募河南北淮南六十七州兵四  
萬四千餘人詣平壤鏐方行營戊午鴻臚卿蕭嗣業為  
扶餘道行軍總管以伐高麗益縣等州皆言龍見二月  
乙未改元赦洛州夏四月庚辰任雅相為渭江道行軍  
總管契苾何力為遼東道行軍總管蘇定方為平壤道  
行軍總管蕭嗣業為扶餘道行軍總管右驍衛將軍程

名振為鏐方道行軍總管左驍衛將軍龐孝泰為沃沮道行軍總管率三十五軍以伐高麗甲午晦日有食之

秋八月甲戌蘇定方及高麗戰於涓江敗之

通鑑作七月甲戌然

鑑于九月書癸巳朔則甲戌當在八月

九月癸卯及皇后幸李勣許圜師

第壬子徙封賢為沛王冬十月丁卯獵於陸渾戊辰獵於非山癸酉還東都鄭仁泰為鐵勒道行軍大總管蕭嗣業為仙萼道行軍大總管左驍衛大將軍阿史那忠為長岑道行軍大總管以伐鐵勒

二年春二月甲子大易官名甲戌任雅相薨戊寅龐孝  
泰及高麗戰於蛇水死之三月庚寅鄭仁泰及鐵勒戰  
於天山敗之甲午車駕發東都夏四月庚申至自東都  
辛巳作蓬萊宮六月癸亥禁宗戚獻纂組彫鏤秋七月  
戊子以子旭輪生滿月大赦賜酺三日右威衛將軍孫  
仁師為熊津道行軍總管以伐百濟戊戌李義府罷八  
月壬寅許敬宗為太子少師同東西臺三品九月丁丑  
李義府起復冬十月丁酉幸溫湯皇太子監國丁未至

自溫湯庚戌西臺侍郎上官儀同東西臺三品十一月

辛未許圜師罷

考異曰舊紀十一月辛未圜師下獄新紀十一月辛未圜師貶虔州據實錄辛

未免官久之貶虔州舊紀貶虔州在三年二月新紀誤癸酉封子旭輪為殷王是

歲右衛將軍蘇海政為颶風道行軍總管以伐龜茲海  
政殺崑陵都督阿史那彌射

三年春正月乙丑李義府為右相二月減百官一月俸  
賦雍同等十五州民錢以作蓬萊宮乙亥殺駙馬都尉  
韋正矩庚戌慮囚夏四月戊子派李義府於雋州丙午

蓬萊宮舍元殿成五月壬午柳州蠻叛冀州都督長史  
劉伯英以嶺南兵伐之六月吐蕃攻吐谷渾涼州都督  
鄭仁泰為青海道行軍大總管以救之秋八月戊申詔  
百寮言事九月戊午孫仁師及百濟戰于白江敗之冬  
十月辛巳詔皇太子五日至光順門監諸司奏事小  
事決之十一月絳州麟見舍元殿前麟趾見十二月庚  
子詔改明年元降京師雍州諸縣死罪以下壬寅安西  
都護高賢為行軍總管以伐弓月

麟德元年春二月戊子如福昌宮癸卯如萬年宮夏四月丙午郇公孝協以賊賜死五月丙寅以旱避正殿秋七月丁未詔以三年正月有事於泰山八月己卯幸舊第降萬年縣死罪以下壬午至自萬年宮丁亥司列太常伯劉祥道兼右相大司憲竇德玄為司元太常伯檢校左相冬十二月丙戌殺上官儀戊子殺庶人忠劉祥道罷太子右中護樂彥璋西臺侍郎孫處約同知軍國政事

二年春二月壬午如東都三月甲寅司戎太常伯姜恪

同東西臺三品戊午遣使慮京師諸司及雍洛二州因

東都乾元殿成閏月癸酉日有食之疎勒弓月吐蕃攻

于闐西州都督崔智辯

考異曰實錄作西州都督此時未有西州必西州也

左武

衛將軍曹繼叔救之夏四月丙午赦桂廣黔三都督府

丙寅講武于邛山之陽戊辰左侍極陸敦信檢校右相

孫處約樂彥瑋罷五月辛卯頒李淳風所造麟德歷冬

十月壬戌帶方州刺史劉仁軌為大司憲兼知政事丁



卯如泰山大有年

乾封元年春正月戊辰朔車駕至泰山是日親祀昊天上帝已巳升山行封禪之禮庚午禪於社首以皇后為

亞獻

顧炎武曰舊唐書以朔日祭天子山明日登封又明日禪社首次序甚明新書改云戊辰封于泰山

庚午禪于社首是以祭天封山二事併為一事而繫於戊辰之日文雖簡而事不核矣

壬申大赦

改元賜文武官階勲爵民年八十以上版授下州刺史司馬縣令婦人郡縣君七十以上至八十賜古爵一級民酺七日女子百戶牛酒免所過今年租賦給復齊州

一年半宛州二年辛卯幸曲阜祀孔子贈太師二月己未如亳州祀老子追號太上玄元皇帝縣人宗姓給復一年夏四月甲辰至自亳州庚戌陸敦信罷五月庚寅

鑄乾封泉寶錢

舊書此庚寅日上屬四月然四月己有甲辰不得又有庚寅明是漏書五月也

此從通鑑

六月壬寅高麗泉男生請內附右驍衛大將軍契

必何力為遼東安撫大使率兵援之左金吾衛將軍龐同善營州都督高侃為遼東道行軍總管左武衛將軍薛仁貴左監門衛將軍李謹行為後援秋七月乙丑徙

封旭輪為豫王庚午劉仁軌兼右相八月辛丑竇德立  
薨丁未殺始州刺史武惟良淄州刺史武懷運九月龐  
同善及高麗戰敗之冬十二月己酉李勣為遼東道行  
臺大總管率六總管兵以伐高麗

二年春正月丁丑以旱避正殿減膳慮囚癸未罷乾封泉寶  
錢夏六月乙卯西臺侍郎楊武戴至德東臺侍郎李安  
期司列少常伯趙仁本同東西臺三品東臺舍人張文  
瓘參知政事秋七月己卯以旱避正殿減膳遣使慮囚

八月己丑朔日有食之辛亥李安期罷九月庚申以領  
藥皇太子監國辛未李勣及高麗戰于新城敗之是歲  
嶺南獠陷瓊州

總章元年春正月劉仁軌為遼東道副大總管兼安撫  
大使涇江道行軍總管二月丁巳皇太子釋奠於國學

舊書在二月癸未新書禮志又在三月戊寅如九成宮壬午李勣敗高麗

克扶餘南蘇木底蒼巖城三月庚寅大赦改元夏四月  
丙辰以星變避正殿減膳撤樂詔内外官言事庚申以

太原元從西府功臣為二等其子孫授階爵有差辛巳  
楊武薨秋八月癸酉至自九成宮九月癸巳李勣敗高  
麗王高藏執之高麗悉平以其地為安東都護府冬十  
二月丁巳李勣俘高藏以獻丁卯有事於南郊甲戌姜  
恪檢校左相司平太常伯闕立本守右相

二年春二月辛酉右肅機李敬玄為西臺侍郎張文瓘  
為東臺侍郎同東西臺三品三月丙戌東臺侍郎郝處  
俊同東西臺三品癸巳皇后親蠶夏四月己酉如九成

宮六月戊申朔日有食之括州大風雨海水溢冀州大

水並遣使賑給秋七月癸巳左衛大將軍契苾何力為

烏海道

舊書作  
駕海道

行軍大總管以援吐谷渾劔南益瀘等

一十九州旱遣使存問賑貸之九月壬寅如岐州乙巳

赦岐州賜高年粟帛冬十月丁巳至自岐州十一月丁

亥徙封旭輪為冀王改名輪十二月戊申李勣薨

咸亨元年春正月丁丑劉仁軌罷二月戊申慮囚三月

甲戌朔大赦改元壬辰許敬宗罷夏四月癸卯吐蕃陷

西域十八州及龜茲撥換城罷安西四鎮己酉李敬玄  
罷辛亥右威衛大將軍薛仁貴為邏娑道行軍大總管  
以伐吐蕃庚午如九成宮高麗酋長鉗牟岑叛寇邊左  
監門衛大將軍高侃為東州道行軍總管右領軍衛大  
將軍李謹行為燕山道行軍總管以伐之六月壬寅朔  
日有食之秋七月甲戌以雍華蒲同四州旱遣使慮囚  
減中御諸廩馬戊子李敬玄起復薛仁貴及吐蕃戰於  
大非川敗績八月庚戌以穀貴禁酒丁己至自九成宮

丙寅以旱避正殿減膳九月丁丑給復雍華同岐邠隴  
六州一年閏月癸卯皇后以旱請避位甲寅姜恪為涼  
州道行軍大總管以伐吐蕃冬十月癸酉大雪庚辰詔  
文武官言事乙未趙仁本罷十二月庚寅詔官名皆復  
舊

二年春正月乙巳如東都皇太子監國二月辛未遣使  
存問諸州夏六月癸巳以旱慮囚冬十月丙子求明禮  
樂之士十一月甲午朔日有食之庚戌如許州遣使存



問所過疾老鰥寡慮因十二月癸酉獵于昆陽丙戌還

東都是歲姜恪為侍中

按新書云關立本為中書令考立本于總章元年守右相即中

書令也咸亨二年又云為中書令事屬重出宰相表亦然又按關立本傳咸亨元年官復舊名改中書令卒安得二年方為中書令耶今刪

三年春正月辛丑姚州蠻寇邊太子右衛副率梁積壽

為姚州道行軍總管以伐之二月己卯姜恪薨夏四月

壬申校旗于洛水之陰秋九月癸卯徙封賢為雍王

按舊

書新書皆云十月己未皇太子監國據上咸亨二年正月乙巳如東都皇太子監國至下十一月甲辰始書至

自東都則自去年至此皆皇太子監國也此處創不應複書今刪 冬十一月戊子朔日

有食之甲辰至自東都十二月金紫光祿大夫致仕劉仁軌為太子左庶子同中書門下三品

四年夏四月丙子如九成宮閏五月丁卯燕山道總管李謹行擊破高麗叛者于靺廬河秋七月婺州大水八月辛丑以不豫詔皇太子聽諸司啓事冬十月壬午闕立本薨乙未以皇太子納妃赦岐州賜酺三日乙巳至自九成宮

上元元年春二月壬午劉仁軌為雞林道行軍大總管以代新羅三月辛亥朔日有食之己巳皇后親蠶秋八月壬辰皇帝稱天皇皇后稱天后追尊六代祖宣簡公為宣皇帝妣張氏曰宣莊皇后五代祖懿王為光皇帝妣賈氏曰光懿皇后增高祖太宗及后諡大赦改元賜酺三日九月癸丑追復長孫無忌官爵冬十一月丙午如東都已酉獵於華山曲武原十二月癸未蔣王憚自殺

二年春正月己未給復雍同華岐隴五州一年辛未吐蕃請和二月劉仁軌及新羅戰於七重城敗之三月丁巳天后親蠶夏四月辛巳天后殺周王顯妃趙氏丙戌以旱避正殿減膳撤樂詔百官言事巳亥天后殺皇太子五月戊申追號皇太子為孝敬皇帝

胡三省曰帝子謚皇帝始此

六月戊寅立雍王賢為皇太子大赦秋七月辛亥杞王上金兔官削封邑八月庚寅葬孝敬皇帝于恭陵丁酉詔婦人為官官者歲一見其親庚子張文瓘為侍中郝

欽定四庫全書

卷三

處俊為中書令劉仁軌為尚書左僕射戴至德為右僕射

儀鳳元年春正月壬戌徙封輪為相王丁卯納州獠寇  
邊二月丁亥如汝州溫湯遣使慮免汝州輕繫三月癸  
卯黃門侍郎來恒中書侍郎薛元超同中書門下三品  
甲辰還東都免汝州今歲半租賜民八十以上帛閏月  
己巳吐蕃寇鄯廓河芳四州左監門衛中郎將令狐智  
通伐之乙酉周王顯為洮河道行軍元帥領左衛大將

軍劉審禮等十二總管相王輪為涼州道行軍元帥領  
契苾何力等軍以伐吐蕃夏四月戊申至自東都甲寅  
中書侍郎李義琰同中書門下三品戊午如九成宮六  
月癸亥黃門侍郎高智周同中書門下三品秋七月乙  
未吐蕃寇疊州八月庚子以星變避正殿減膳撤樂損  
食粟馬廩囚詔文武官言事甲子停南北中尚梨園作  
坊減少府雜匠是月青州海溢冬十月乙未至自九成  
宮丙午降封郇王素節鄆陽郡王十一月壬申大赦改

欽定四庫全書

欽定續通志

卷三

三

元庚寅李敬立為中書令十二月戊午遣使分道巡撫

二年春正月乙亥耕藉田夏四月太子左庶子張大安

同中書門下三品河南河北旱遣使賑給五月吐蕃寇

扶州秋八月辛亥劉仁軌為洮河軍鎮守使冬十月壬

辰徙封顯為英王更名哲

舊書在八月

十二月乙卯募關內

河東諸州猛士以伐吐蕃是歲西突厥及吐蕃竝寇安

西

三年春正月辛酉百官四夷朝天后于光順門

謹按通鑑輯覽

新批天子在而百官四夷獨朝其后豈復知有天日耶易比之上六曰比之無首孔子以為無所容高宗之謂矣

丙子李敬玄為洮河道行軍大總管癸未遣使募河南河北猛士以伐吐蕃夏四月丁亥以旱避正殿慮因戊申大赦改明年為通乾元年五月壬戌如九成宮秋九月辛酉至自九成宮癸亥張文瓘薨丙寅李敬玄劉審禮及吐蕃戰于青海敗績審禮死之冬十月丙申停劍南隴右歲貢閏十一月壬子來恒薨

舊書閏在十月

十二月癸

丑罷通乾號



調露元年春正月戊子如東都庚戌戴至德薨夏四月辛酉郝處俊為侍中五月丙戌皇太子監國戊戌作紫桂宮六月辛亥大赦改元吏部侍郎裴行儉伐西突厥秋九月壬午行儉敗西突厥執其可汗都支冬十月突厥溫傳奉職二部寇邊單于大都護府長史蕭嗣業伐之十一月戊寅高智周罷甲辰禮部尚書裴行儉為定襄道行軍大總管以伐突厥

永隆元年春二月癸丑如汝州溫湯丁巳至少室山乙

丑還東都三月裴行儉及突厥戰于黑山敗之夏四月  
乙丑如紫桂宮戊辰黃門侍郎裴炎崔知溫中書侍郎  
王德真同中書門下三品秋七月己卯吐蕃寇河源辛  
巳李敬玄及吐蕃戰於湟川敗績左武衛將軍黑齒常  
之為河源軍經畧大使突厥寇雲州都督竇懷哲敗之  
八月丁未還東都丁巳貶李敬玄為衡州刺史甲子廢  
皇太子為庶人乙丑立英王哲為皇太子大赦改元賜  
酺三日己巳貶張大安為普州刺史九月甲申王德真

罷冬十月壬寅降封曹王明為零陵郡王戊辰至自東都十一月壬申朔日有食之

開耀元年春正月乙亥突厥寇原慶二州命將軍李知十王杲等分兵禦之辛巳賜京官酺三日癸巳裴行儉為定襄道行軍大總管以伐突厥己亥減殿中太僕馬省諸方貢獻免雍岐華同四州稅二年河南河北調一年二月丙午皇太子釋奠于國學三月辛卯郝處俊罷夏五月乙酉常州人劉龍子謀反伏誅丙戌定襄道副

總管曹懷舜及突厥戰於橫水敗績己丑黑齒常之及吐蕃戰于良非川敗之六月壬子永嘉郡王暉有罪伏誅秋七月己丑以太平公主下嫁赦京師甲午劉仁軌罷左僕射閏月丁未裴炎為侍中崔知溫薛元超守中書令庚戌以餌藥皇太子監國庚申裴行儉及突厥戰敗之八月丁卯以河南河北大水遣使賑乏絕室廬壞者給復一年溺死者賜物人三段九月壬戌裴行儉俘突厥溫傳可汗阿史那伏念以獻乙丑改元赦定襄軍

及諸道緣征官吏兵募冬十月丙寅朔日有食之

舊書既書

十月丙寅朔日食方書乙丑改元又書丙寅新何史那伏念通鑑于丙寅朔下方連書壬戌乙丑則又因舊書而益之十一月癸卯徙庶人賢於巴州誤也

永淳元年春二月癸未以孫重照生滿月大赦改元賜  
酺三日是月突厥車薄咽麴寇邊三月戊午立重照為  
皇太孫夏四月甲子朔日有食之丙寅如東都皇太子  
監國辛未裴行儉為金牙道行軍大總管率三總管兵  
以伐突厥行儉未行而卒安西副都護王方翼及車薄

咽麪戰于熱海敗之丁亥黃門侍郎郭待舉兵部侍郎  
岑長倩祕書員外少監郭正一吏部侍郎魏玄同與中  
書門下同承受進止平章事五月乙卯洛水溢六月甲  
子突厥骨咄祿寇邊嵐州刺史王德茂死之是月大蝗  
秋七月作萬泉宮己亥作奉天宮庚申零陵王明自殺  
九月吐蕃寇柘州驍衛郎將李孝逸伐之冬十月丙寅黃  
門侍郎劉濟賢同中書門下平章事吐蕃入寇河源軍  
使婁師德擊敗之

弘道元年春正月甲午辛奉天宮二月庚午突厥寇定  
州刺史霍王元軌敗之三月庚寅突厥寇單于都護府  
司馬張行師死之庚子李義琰罷癸丑崔知溫薨夏四  
月己未還東都壬申郭待舉郭正一同中書門下平章  
事甲申綏州部落稽白鐵余寇邊右武衛將軍程務挺  
敗之五月乙巳突厥寇蔚州刺史李思儉死之秋七月  
甲辰徙封輪為豫王改名旦薛元超罷八月乙丑皇太  
子朝于東都皇太孫留守京師

舊書是日作己丑然上  
七月己有己丑則為連

月有二巳丑新書于是日作乙丑而下九月又有乙丑  
是為連月有二乙丑今此從新書作乙丑而九月之乙  
丑則改丁卯淳沲溢己巳河溢壞河陽城九月己丑以  
從己丑

太平公主子生赦東都冬十月癸亥幸奉天宮十一月  
戊戌右武衛將軍程務挺為單于道安撫大使以伐突  
厥辛丑皇太子監國丁未還東都戊申裴炎劉齊賢郭  
正一兼於東宮平章事十二月丁巳改元大赦是夕皇  
帝崩於貞觀殿年五十六謚曰天皇帝廟號高宗陵  
曰乾陵天寶八載改謚天皇大聖皇帝十三載增謚天



皇大聖大弘孝皇帝

高宗永徽六年顯慶五年龍朔三年麟德乾封總  
章各二年咸亨四年上元二年儀鳳三年調露永  
隆開耀永淳弘道各一年凡三十四年



欽定續通志卷三

欽定四庫全書

史部

欽定續通志卷

四至  
七

主事臣尹壯圖覆勘

總校官原任侍講臣王燕緒

欽定四庫全書

欽定續通志卷四

唐紀

中宗一

附則天武后

臣等謹按唐史臣吳兢作則天本紀而新舊唐書因之新書於后妃中又別為武氏立傳蓋吳兢劉昫本用司馬遷紀呂后之例而新書則又用班固法也獨沈既濟援春秋書公在乾侯之義請併天

后于孝和紀中每於歲首必書孝和所在以統之  
書曰某年春正月皇帝在房陵太后行某事改某  
制紀稱孝和而事述太后名不失正禮不違常一  
時議者咸韙其論孫氏西齋 范祖禹唐鑑踵而  
有作正名定分其歸一揆後之秉筆者可以得所  
據依矣今述唐紀以中宗嗣聖紀年而以光宅至  
長安年號側注于下庶乎沈氏所謂名禮兩得者  
至紀體謹嚴傳文委備詳略互見以盡二十一年

之行事無遺則猶是新書之意也

中宗皇帝諱顯高宗第七子也母曰則天順聖皇后武氏初封周王儀鳳二年徙封英王改名哲永隆元年章懷太子廢立為皇太子弘道元年十二月甲子即皇帝位先是高宗遺詔軍國大務不決者兼取天后進止及即位尊后為皇太后皇太后臨朝稱制大赦賜九品以上勲官一級庚午韓王元嘉為太尉霍王元軌為司徒舒王元名為司空甲戌劉仁軌為尚書左僕射裴炎為

中書令劉齊賢為侍中同中書門下三品戊寅郭待舉

魏玄同岑長倩同中書門下三品癸未郭正一罷

嗣聖元年

二月睿宗文明元年九月太后光宅元年

春正月癸未改元嗣聖

立妃韋氏為皇后

依通鑑增

癸巳左散騎常侍韋弘敏為太

府卿同中書門下三品二月戊午太后廢皇帝為廬陵

王幽之己未立豫王旦為皇帝妃劉氏為皇后立永平

郡王成器為皇太子大赦改元為文明賜文武官五品

以上爵一等九品以上勲兩轉老人版授官賜束帛職

官五品以上舉所知一人皇太后仍臨朝稱制庚申廢

皇太孫重照為庶人殺庶人賢于巴州

考異曰殺庶人賢則天實錄在

二月舊本紀在三月

甲子皇帝率羣臣上尊號于武成殿丁卯冊

皇帝丁丑太常卿王德真為侍中中書侍郎劉禕之同

中書門下三品庚辰贈玉清觀道士大中大夫王遠知

光祿大夫三月丁亥徙封上金為畢王素節葛王

按上金高

宗第三子素節高宗第四子俱于高宗永徽元年始封王嗣武后嫁上金母楊氏素節母蕭淑妃因誣奏削上

金素節王爵至是兩次徙封卒殺之事詳諸王列傳夏四月丁巳滕王元嬰薨辛

酉徙封上金為澤王素節許王丁丑太后遷帝于均州  
按遷帝于均州之前新紀尚有四月癸酉遷房州一節  
顧炎武以為歐陽修博採而誤今但載遷均州其先遷  
房州之誤從刪至後此嗣聖三年三月則始書云遷帝于房州

武承嗣為太常卿同中書門下三品秋七月戊午廣州

崑崙殺其都督路元叡乙丑突厥寇朔州左武衛大將

軍程務挺敗之八月庚寅葬高宗皇帝于乾陵丙午武

承嗣罷九月甲寅太后大赦改元光宅旗幟尚白易內

外官服青者以碧大易官名

詳職官略

改東都為神都追尊



老子母為先天太后丙辰左武衛大將軍程務挺為單

于道安撫大使以備突厥已巳尊武氏五代祖克已

舊書

外戚傳五代祖名居常

為魯國公妣裴氏為魯國夫人高祖居常

舊書外戚傳

高祖名克已

為太尉北平郡王妣劉氏為王妃曾祖儉

為太尉金城郡王妣宋氏為王妃祖華為太尉太原郡

王妣趙氏為王妃考士驥為太師魏王妣楊氏為王妃

丁丑柳州司馬李敬業舉兵于揚州以討亂貶韋弘敏

為汾州刺史冬十月癸未楚州司馬李崇福以山陽安

宜鹽城三縣歸于敬業甲申左玉鈐衛大將軍梁郡公  
孝逸為揚州道行軍大總管左金吾衛大將軍李知十  
為副率兵三十萬以拒李敬業丁亥左肅政臺御史大  
夫騫味道檢校內史同鳳閣鸞臺三品鳳閣舍人李景  
謏同鳳閣鸞臺平章事壬辰李敬業克潤州丙申殺裴  
炎追諡武氏五代祖魯國公曰靖高祖北平郡王曰恭  
肅曾祖金城郡王曰義康祖太原郡王曰安成考魏王  
曰忠孝丁酉曲赦揚楚二州復敬業姓徐氏貶劉齊賢

為辰州刺史李景謏罷右史沈君諒著作郎崔譽為正  
諫大夫同鳳閣鸞臺平章事十一月辛亥左鷹揚衛大  
將軍黑齒常之為江南道行軍大總管庚申右監門衛  
將軍蘓孝祥及徐敬業戰于阿谿死之乙丑徐敬業將  
王那相殺敬業降丁卯郭待舉罷鸞臺侍郎韋方質為  
鳳閣侍郎同鳳閣鸞臺平章事十二月戊子遣御史察  
風俗癸卯殺程務挺

二年

太后垂拱元年

春正月帝在均州

按均州與房州地不相遠而范祖禹唐鑑于中

宗嗣聖元年不叙遷均州一節是以嗣聖二年正月不復著曰帝在均州今本新舊書既于嗣聖元年四月丁丑書遷于均州則二年之春應依綱目書曰帝在均州所以紀其實也自三月丙辰遷房州之後則每年歲首俱書房州矣

丁未太后赦天下改元垂拱庚戌騫味道守內

史戊辰劉仁軌薨二月乙巳春官尚書武承嗣秋官尚書裴居道右肅政臺御史大夫韋思謙同鳳閣鸞臺三

品突厥寇邊左玉鈐衛中郎將淳于處平為陽曲道行

軍總管以擊之沈君諒罷三月崔謩罷丙辰太后遷帝

于房州

依唐鑑輯

辛酉武承嗣罷辛未頒垂拱格夏四月丙

子貶騫味道為青州刺史癸未淳于處平及突厥戰于  
忻州敗績五月丙午裴居道為納言丁未流王德真于

象州己酉冬官尚書蘓良嗣守納言封王子成義

實錄  
作成

美為恒王

舊書在太后垂  
拱三年正月

壬戌以旱慮囚壬申韋方質

同鳳閣鸞臺三品六月天官尚書韋待價同鳳閣鸞臺

三品秋七月己酉文昌左丞魏玄同為鸞臺侍郎同鳳

閣鸞臺三品冬十一月癸卯韋待價為燕然道行軍大總

管以伐突厥

三年

太后垂拱二年

春正月帝在房州

依舊鑑增

辛酉皇太后詔復

政皇帝固讓皇太后依舊臨朝稱制大赦賜酺三日內

外官勲一轉二月辛未朔日有食之三月戊申作銅匱

夏四月庚辰岑長倩為內史五月丙午裴居道為內史

六月辛未蘓良嗣同鳳閣鸞臺三品己卯韋思謙守納

言冬十月己巳

五行志作九月己巳統紀在十二月

有山出于新豐縣改

新豐為慶山赦囚給復一年賜酺三日十二月免并州

百姓庸調終其身

四年

太后垂拱三年

春正月帝在房州

唐鑑不載今依綱目增

閏月丁卯

太后封王子隆基為楚王隆範衛王隆業趙王二月己亥以旱避正殿減膳丙辰突厥寇昌平黑齒常之擊之三月乙丑韋思謙罷夏四月辛丑追號孝敬皇帝妃裴氏曰哀皇后葬于恭陵癸丑以旱慮囚命京官九品以上言事壬戌裴居道為納言五月丙寅夏官侍郎張光輔為鳳閣侍郎同鳳閣鸞臺平章事庚午殺劉祿之秋八月壬子魏玄同兼檢校納言交趾人李嗣仙殺安南

都護劉延祐據交州桂州司馬曹玄靜敗之是月突厥

寇朔州燕然道行軍大總管黑齒常之敗之九月己卯

虢州人楊初成自稱郎將募人迎帝于房州

依唐鑑輯

不果

見殺冬十月庚子右監門衛中郎將囊寶璧及突厥戰

敗績十二月壬辰韋待價為安息道行軍大總管安西

大都護閻溫古副之以擊吐蕃是歲大饑

五年

太后垂拱四年

春正月帝在房州

依唐鑑增

甲子太后詔增七

廟立高祖太宗高宗廟于神都作崇先廟于西京庚午



毀乾元殿作明堂三月壬戌殺麟臺少監周思茂夏四月戊戌殺太子通事舍人郝象賢五月庚申得寶圖于洛水乙亥加尊號為聖母神皇六月丁亥朔日有食之得瑞石于汜水秋七月丁巳大赦改寶圖為天授聖圖洛水為永昌洛水封其神為顯聖侯加特進禁漁釣改嵩山為神岳封其神為天中王太師使持節大都督賜酺五日八月丙午博州刺史瑯邪郡王沖舉兵討亂遣左金吾衛大將軍邱神勣拒之戊申沖死之庚戌越王

貞舉兵于豫州以討亂辛亥曲赦博州九月丙辰左豹  
韜衛大將軍魏崇裕為中軍大總管岑長倩為後軍大  
總管以拒越王貞張光輔為諸軍節度削越王貞及瑯  
邪郡王沖屬籍改其姓為虺氏貞死之內寅赦豫州殺  
韓王元嘉魯王靈夔范陽郡王藹黃國公譔東莞郡公  
融及常樂公主皆改其姓為虺氏丁卯左肅政臺御史  
大夫騫味道夏官侍郎王本立同鳳閣鸞臺平章事冬  
十一月辛酉殺濟州刺史薛頤及其弟駙馬都尉紹十

二月乙酉殺霍王元軌江都郡王緒及殿中監裴承光  
己亥殺竊味道己酉拜洛受圖辛亥明堂成改為萬象  
神宮大赦

六年

太后永昌元年

春正月帝在房州

依唐鑑輯

乙卯太后享于萬

象神宮大赦改元永昌丁巳舒王元名為司徒戊午布

政于萬象神宮頒九條以訓百官二月丁酉尊考魏忠

孝王曰周忠孝太皇置崇先府官戊戌追諡妣楊氏曰

周忠孝太后太原郡王曰周安成王妣趙氏為王妃金

城郡王曰魏義康王妃宋氏為王妃北平郡王曰趙肅  
恭王妃劉氏為王妃五代祖魯國公曰太原郡王夫人  
裴氏為王妃三月甲子張光輔守納言癸酉天官尚書  
武承嗣為納言張光輔守內史夏四月甲辰殺汝南郡  
王瑋鄴陽郡公謹廣漢郡公謚汶山郡公綦零陵郡王  
俊廣都郡公瑋徙其家于雋州己酉殺天官侍郎鄧玄  
挺五月丙辰韋待價及吐蕃戰于寅識迦河敗績白馬  
寺僧懷義為新平道舊傳作清平道行軍大總管以擊突厥秋

七月丁巳流紀王慎于巴州改其姓為虺氏丙子流韋  
待價于繡州殺閩溫古戊寅王本立同鳳閣鸞臺三品  
八月癸未薛懷義為新平道中軍大總管以擊突厥甲  
申殺張光輔洛州司馬弓嗣業洛陽令弓嗣明陝西參  
軍弓嗣古流人徐敬真辛丑殺陝州刺史郭正一丁未  
殺相州刺史弓志元蒲州刺史弓彭祖尚方監王全基  
九月庚戌殺恒山郡王承乾之子厥閏月甲午殺魏玄  
同夏官侍郎崔瑗戊申殺彭州刺史劉易從冬十月癸

丑殺涼州都督李光誼丁巳殺陝州刺史劉延景戊午  
殺右武威衛大將軍黑齒常之右鷹揚衛將軍趙懷節  
己未殺嗣鄭王璿丁卯春官尚書范履冰鳳閣侍郎邢  
文偉同鳳閣鸞臺平章事十一月庚辰太后大赦改元  
載初以十一月為正月十二月為臘月來歲正月為一  
月以周漢之後為二王後封舜禹湯之後為三恪周隋  
同列國封其嗣乙未除唐宗室屬籍十二月丙寅殺劉  
齊賢

七年

周武氏天授元年

春正月帝在房州

依唐鑑增

戊子王本立罷

邢文偉為內史岑長倩武承嗣同鳳閣鸞臺三品鳳閣

侍郎武攸寧為納言甲午流韋方質于儋州二月丁卯

殺地官尚書王本立

實錄作地官尚書王本立薨御史臺記本立為周興所殺

三月

乙酉以旱減膳丁亥蘓良嗣薨夏五月戊子殺范履冰

實錄

唐歷在四月丁巳

己亥殺梁郡公孝逸六月戊申殺汴州刺史

柳明肅秋七月辛巳流舒王元名于和州壬午殺豫章

郡王亶丁亥殺澤王上金許王素節甲午赦永昌縣癸

郊殺太常丞蘓踐言八月辛亥殺許王素節之子璟曾  
江縣令白令言甲寅殺裴居道壬戌殺將軍阿史那惠  
右司郎中喬知之癸亥殺尚書右丞張行廉泰州刺史  
杜儒童甲子殺流人張楚金戊辰殺流人元萬頃苗神  
客辛未殺南安郡王潁鄆國公昭及諸宗室李直李敞  
李然李勲李策李越李黥李元李英李志業李知言李  
元貞九月乙亥殺鉅鹿郡公晃麟臺郎裴望及其弟司  
膳丞璉壬午太后改國曰周大赦改元天授加尊號曰



聖神皇帝以豫王為皇嗣賜姓武氏永平王為皇孫

依唐

增鑑

丙戌立武氏七廟于神都追尊周文王曰始祖文皇

帝妣妣氏曰文定皇后尊平王少子武曰睿祖康皇帝

妣姜氏曰康惠皇后太原靖王曰嚴祖成皇帝妣曰成

莊皇后趙肅恭王曰肅祖章敬皇帝妣曰章敬皇后魏

義康王曰烈祖昭安皇帝妣曰昭安皇后周安成王曰

顯祖文穆皇帝妣曰文穆皇后忠孝太皇曰太祖孝明

高皇帝妣曰孝明高皇后追封伯父及兄弟之子為王

堂兄為郡王兄子承嗣為魏王三思為梁王從兄子懿宗等十二人皆為郡王諸姑姊妹為長公主及郡主司賓卿史務滋守納言鳳閣侍郎宗秦客檢校內史給事中傳游藝為鸞臺侍郎同鳳閣鸞臺平章事令史務滋等十人分道存撫天下改內外官所佩魚並作龜冬十月丁巳給復并州武興縣百姓子孫相承如漢豐沛甲子貶宗秦客為遵化尉丁卯殺流人韋方質己巳殺許王素節之子瑛琪琬瓚瑒瑤琛唐臣辛未貶邢文偉為珍

州刺史置大雲寺改唐太廟為享德廟

按改唐太廟為享德廟唐統紀

在正月甲戌實錄舊紀俱在三月

十一月

周為正月

甲戌改置社稷旗幟尚

赤戊寅殺雅州刺史劉行實及其弟渠州刺史行瑜尚

衣奉御行感兄子左鷹揚衛將軍虔通戊子武承嗣為

文昌左相庚寅賜酺乙未殺邱神勣左豹韜衛將軍衛

蒲山庚子殺史務滋十二月

周為臘月

己未始用周臘

八年

周武氏天授二年

春正月

周為一月

帝在房州

依唐鑑增

夏四月壬

寅朔日有食之丙午大赦五月丁亥岑長倩為武威道

行軍大總管以擊吐蕃六月庚戌左肅政臺御史大夫  
格輔元為地官尚書鸞臺侍郎樂思晦鳳閣侍郎任知  
古同鳳閣鸞臺平章事秋七月庚午徙關內雍同等七  
州戶以實神都八月戊申武攸寧罷夏官尚書歐陽通  
為司禮卿兼判納言事庚申殺右玉鈐衛大將軍張虔  
勗九月乙亥殺岐州刺史雲弘嗣壬辰殺傅游藝癸巳  
左羽林衛大將軍武攸寧守納言冬官侍郎裴行本洛  
州司馬狄仁傑為地官侍郎同鳳閣鸞臺平章事冬十

月己酉殺岑長倩歐陽通格輔元壬戌殺樂思晦左衛

將軍李安靜

九年

周武氏如意元年再改長壽

春正月帝在房州

依唐鑑增

戊辰夏官

尚書楊執柔同鳳閣鸞臺平章事庚午貶任知古為江

夏令狄仁傑彭澤令流裴行本于嶺南乙亥殺右衛大

將軍泉獻誠庚辰司刑卿李游道為冬官尚書同鳳閣

鸞臺平章事二月戊午秋官尚書袁智弘同鳳閣鸞臺

平章事夏四月丙申朔日有食之大赦改元如意禁斷

天下屠殺五月浴水溢秋七月又溢八月甲戌河溢壞  
河陽縣戊辰武承嗣武攸寧楊執柔罷秋官侍郎崔元  
綜為鸞臺侍郎夏官侍郎李昭德為鳳閣侍郎權檢校  
天官侍郎姚璿為文昌左丞檢校地官侍郎李元素為  
文昌右丞營膳大匠王璿為夏官尚書司賓卿崔神基  
同鳳閣鸞臺平章事九月庚子赦天下改元長壽改用  
九月社賜酺七日癸卯以并州為北都癸丑流李游道  
袁智弘王璿崔神基李元素于嶺南冬十月丙戌武威

道行軍總管王孝傑敗吐蕃克四鎮十二月殺豫王妃  
劉氏德妃竇氏降封皇孫成器為壽春郡王恒王成義  
衡陽郡王楚王隆基臨淄郡王衛王隆範巴陵郡王趙  
王隆業彭城郡王

十年周武氏長壽二年春正月帝在房州依唐鑑增庚子夏官侍郎

婁師德同鳳閣鸞臺平章事甲寅殺尚方監裴匪躬內  
常侍武后傳作監門衛大將軍范雲仙三月己卯殺左衛員外大將

軍阿史那元慶白潤府果毅薛大信夏五月乙未殺冬

官尚書蕪幹相州刺史來同敏癸丑河溢棣州秋九月  
丁亥朔日有食之乙未加號金輪聖神皇帝大赦賜酺  
七日作七寶庚子追尊烈祖昭安皇帝曰渾元昭安皇  
帝顯祖文穆皇帝曰立極文穆皇帝太祖孝明高皇帝  
曰無上孝明高皇帝辛丑姚璿罷

宰相表在長壽元年九月文昌右

丞韋巨源同鳳閣鸞臺平章事秋官侍郎陸元方為鸞  
臺侍郎同鳳閣鸞臺平章事司賓卿豆盧欽望守內史  
冬十二月甲戌突厥默啜寇靈州右鷹揚衛大將軍李



多祚敗之

十一年

周武氏延載元年

春正月帝在房州

依唐鑑增

甲午婁師德

為河源積石懷遠等軍營田大使二月庚午薛懷義為

伐逆道

舊書懷義傳作伐北道

行軍大總管領十八將軍以擊默

吸乙亥以旱慮囚己卯武威道大總管王孝傑及吐蕃

戰於冷泉敗之三月甲申鳳閣舍人蘇味道為鳳閣侍

郎同鳳閣鸞臺平章事李昭德檢校內史薛懷義為朔

方道行軍大總管擊默吸昭德為朔方道行軍長史味

道為司馬夏五月甲午加號越古金輪聖神皇帝大赦  
改元延載賜酺七日秋七月癸未嵩嶽山人武什方為  
正諫大夫同鳳閣鸞臺平章事八月什方罷戊辰王孝  
傑為瀚海道行軍總管己巳司賓少卿姚璿守納言左  
肅政臺御史大夫楊再思為鸞臺侍郎洛州司馬杜景  
佺檢校鳳閣侍郎同鳳閣鸞臺平章事戊寅流崔元綜  
于振州九月壬午朔日有食之壬寅貶李昭德為南賓  
尉冬十月壬申文昌右丞李元素為鳳閣侍郎右肅政

臺御史中丞周允元檢校鳳閣侍郎同鳳閣鸞臺平章  
事嶺南獠寇邊容川都督張玄遇為桂永等州經略大  
使十一月辛巳加號慈氏越古金輪聖神皇帝改元證  
聖大赦賜酺三日戊子貶豆盧欽望為趙州刺史韋巨

源鄜州刺史

舊紀傳新紀表皆作鄜州統紀作瀛州實錄唐歷作麟州吳縝曰天冊萬歲元年

正月戊子貶韋巨源鄜州刺史紀傳不同推究其實則紀是而傳誤何以言之按地理志云麟州開元十二年析勝州之連谷銀城置且天冊萬歲元年歲在乙未而開元十二年歲在甲子相距三十年是時既未有麟州則巨源何由貶為刺史乎以此知其實鄜字而誤為麟也按胡三省云貞觀五年置麟州屬松州都督府十

六年開山洞置濤州屬黔州都督府是麟州自為羈縻  
州亦見唐地志而非關內道之麟州始置于開元中者  
也吳氏所考殊為未悉司馬光通鑑亦依實錄唐歷改鄜州為麟州杜景佺濤州刺史蘓

味道集州刺史陸元方綏州刺史丙申萬象神宮火丙

午王孝傑為朔方行軍總管以擊突厥

十二年周武氏天冊

春正月帝在房州

依唐鑑增

二月己酉

朔日有食之壬子殺薛懷義甲子罷慈氏越古號三月

丙辰周允元薨夏四月戊寅建大周萬國頌德天樞秋

七月辛酉吐蕃寇臨洮王孝傑為肅邊道行軍大總管

以擊之九月甲寅祀南郊加號天冊金輪大聖皇帝大赦改元天冊萬歲以崇先廟為崇尊廟十二月甲戌如神嶽甲申封于神岳改元曰萬歲登封大赦免今歲租稅賜酺十日丁亥禪于少室山給復洛州二年登封告成縣三年癸巳復于神都

十三年

周武氏萬歲  
通天元年

春正月帝在房州

依唐  
鑑增

甲寅婁師

德為肅邊道行軍副總管以擊吐蕃己巳改崇尊廟為太廟二月辛巳尊神嶽天中王為神嶽天中黃帝天靈

妃為天中黃后三月壬寅王孝傑妻師德及吐蕃戰于

素羅汗山敗績王孝傑免

新舊紀皆不載  
今依宰相表增

丁巳復作明

堂改曰通天宮大赦改元萬歲通天賜酺七日夏四月

癸酉檢校夏官侍郎孫元亨同鳳閣鸞臺平章事庚子

敗婁師德為原州都督府司馬五月壬子契丹首領松

漠都督李盡忠歸誠州刺史孫萬榮陷營州殺都督趙

文翽乙丑左鷹揚衛將軍曹仁師右金吾衛大將軍張

玄遇左威衛大將軍李多祚司農少卿麻仁節等擊之

秋七月辛亥春官尚書武三思為榆關道安撫大使納  
言姚璿為副以備契丹八月丁酉張玄遇曹仁師麻仁  
節等及契丹戰于黃鵬谷敗績執玄遇仁節九月庚子  
同州刺史武攸宜為清邊道行軍大總管以擊契丹下  
已吐蕃寇涼州都督許欽明死之庚申并州長史王方  
慶為鸞臺侍郎殿中監李道廣同鳳閣鸞臺平章事冬  
十月辛卯契丹寇冀州刺史陸寶積死之甲午慮囚十  
一月壬戌殺李元素孫元亨洛州錄事參軍綦連耀箕

州刺史劉思禮知天官侍郎石抱忠劉奇給事中周藩鳳  
閣舍人王勣前涇州刺史王劼太子司議郎路敬淳司  
門員外郎劉順之右司員外郎宇文全志來庭縣主簿  
柳璆癸亥突厥默啜寇勝州平狄軍副使安道買敗之  
甲子婁師德守鳳閣侍郎同鳳閣鸞臺平章事

十四年

周武氏神  
功元年

春正月帝在房州

依唐  
鑑增

乙巳慮囚三

月庚子王孝傑及孫萬榮戰于東硤石谷敗績孝傑死  
之戊申赦河南北夏四月戊辰置九鼎于通天宮癸酉



前益州大都督府長史王及善為內史癸未右金吾衛  
大將軍武懿宗為神丘道行軍大總管及右豹韜衛將  
軍何迦密以擊契丹五月癸卯婁師德為清邊道行軍  
副大總管右武衛將軍沙吒忠義為清邊中道前軍總  
管以擊契丹六月丁卯殺監察御史李昭德司僕少卿  
來俊臣己卯尚方少監宗楚客同鳳閣鸞臺三品武承  
嗣三思並同鳳閣鸞臺三品辛卯婁師德安撫河北秋  
七月丁酉武承嗣武三思罷八月丙戌姚璿罷

考異曰  
新表庚

子狄仁傑無納言武三思檢校內史欽望為文昌右  
相同三品舊紀傳及新紀皆無之此月無庚子仁傑三  
思除命在明年  
新表誤重複  
九月壬寅以契丹平大赦改元神功賜

酺七日庚戌婁師德守納言冬十月甲子給復徇忠立

節二縣一年閏月甲寅檢校司刑卿幽州都督狄仁傑

為鸞臺侍郎司刑卿杜景佺為鳳閣侍郎同鳳閣鸞臺

平章事十一月甲子赦天下改元聖歷丙寅宗楚客罷

丁亥李道廣罷

十五年

周武氏聖  
歷元年

春三月癸丑遣職方員外郎徐彥伯

往房陵召廬陵王

依統紀增

戊午帝至自房州

依唐鑑輯

夏四月

庚寅赦神都及河北辛丑婁師德為隴右諸軍大使檢

校河西營田事秋七月辛未杜景佺罷八月突厥寇邊

戊子左豹韜衛將軍閻知微降于突厥寇邊甲午王方

慶罷戊戌武承嗣卒庚子春官尚書武三思檢校內史

狄仁傑兼納言司屬卿武重規為天兵中道大總管沙

吒忠義為天兵西道前軍總管幽州都督張仁亶為天

兵東道總管左羽林衛大將軍李多祚右羽林衛大將

軍閫敬容為天兵西道後軍總管以擊突厥癸丑突厥  
寇蔚州乙卯寇定州刺史孫彥高死之九月甲子夏官  
尚書武攸寧同鳳閣鸞臺三品戊子突厥寇趙州長史  
唐波若降于突厥刺史高歡死之突厥寇相州沙吒忠  
義為河北道前軍總管將軍楊基副之李多祚為後軍

總管大將軍富福信為奇兵總管以禦之壬申周武氏

以帝為皇太子

依綱目輯

令依舊名顯大赦賜酺五日甲戌

唐歷同實錄作丙子

皇太子為河北道行軍元帥以擊突厥戊寅

狄仁傑為河北道行軍副元帥檢校納言辛巳試天官  
侍郎蘓味道為鳳閣侍郎同鳳閣鸞臺平章事冬十月  
癸卯狄仁傑為河北道安撫大使夏官侍郎姚元崇麟  
臺少監李嶠同鳳閣鸞臺平章事閤知微自突厥復歸  
族誅之十一月壬戌以豫王旦為相王依唐鑑輯十二月戊  
子左肅政臺御史中丞吉頊為天官侍郎檢校右肅政  
臺御史中丞魏元忠為鳳閣侍郎同鳳閣鸞臺平章事  
辛亥賜皇太子姓武氏大赦

十六年

周武氏聖歷二年

春正月帝在東宮

依唐鑑增按何焯曰帝在東宮文

義有礙竊謂不然在均州房州則直曰均州房州在東宮則直曰東宮而已正所謂據事直書也

庚申

武攸寧罷二月己丑如緱氏辛卯如嵩陽三月甲戌以

隋唐為二王後婁師德為納言夏四月壬辰魏元忠檢

校并州大都督府長史天兵軍大總管婁師德副之以

備突厥辛丑婁師德為隴右諸軍大使甲辰慮囚秋七

月丙辰洛水溢八月庚子王及善為文昌左相同鳳閣

鸞臺平章事太子宮尹豆盧欽望為文昌右相同鳳閣

鸞臺三品楊再思罷丁未試天官侍郎陸元方為鸞臺

侍郎同鳳閣鸞臺平章事婁師德薨戊申武三思為內

史九月乙亥如福昌縣曲赦庚辰王及善薨是秋黃河

溢冬十月丁亥吐蕃首領贊婆來十一月戊午貶吉頊

為琰川尉

御史臺記  
作安固尉

壬申武三思罷十二月辛巳封皇

太子之子重潤為邵王庚寅陸元方罷

宰相表  
失載

司禮卿

阿史那斛瑟羅為平西軍大總管丁酉狄仁傑為內史

庚子韋巨源為納言乙巳如嵩山

十七年

周武氏久視元年

春正月帝在東宮

依唐鑑增

丁卯如汝州

溫湯戊寅作三陽宮二月乙未立盧欽望罷

宰相表作二月乙未

欽望罷太子賓客然前聖歷元年表內已先有此語三當因神功元年八月庚子複出之文而踵以滋複也

月癸丑夏官尚書唐奉一為天兵中軍大總管以備突

厥夏四月戊申如三陽宮五月己酉朔日有食之癸丑

大赦改元久視罷天冊金輪大聖號賜酺五日給復告

成縣一年秋閏七月己丑天官侍郎張錫為鳳閣侍郎

同鳳閣鸞臺平章事李嶠罷丁酉吐蕃寇涼州隴右諸



軍州大使唐休璟敗之于洪源谷壬寅禁隋楊素子孫  
並不許任京官侍衛八月庚戌魏元忠為隴右諸軍州  
大總管以擊吐蕃庚申敕天下僧錢作大像九月辛丑  
狄仁傑薨冬十月辛亥魏元忠為蕭關道行軍大總管  
以備突厥甲寅復舊正朔改一月為正月仍以歲首正  
月為十一月大赦丁巳韋巨源罷文昌右丞韋安石為  
鸞臺侍郎同鳳閣鸞臺平章事丁卯如新安隴澗山曲  
赦十二月甲寅突厥寇隴右戊午開屠禁諸祠祭令依

舊用牲牢

十八年

周武氏大足元年又改長安

春正月帝在東宮

依唐鑑增

丁丑改

元大足二月己酉鸞臺侍郎李懷遠同鳳閣鸞臺平章

事三月丙申流張錫于循州夏四月丙午大赦癸丑姚

元崇檢校并州以北諸軍州兵馬五月乙亥如三陽宮

丁丑魏元忠為靈武道行軍大總管以備突厥丙申天

官侍郎顧琮同鳳閣鸞臺平章事六月庚申夏官侍郎

李迥秀同鳳閣鸞臺平章事辛未赦告成縣秋七月壬

午蘇味道按察幽平等州兵馬甲申李懷遠罷九月壬申殺邵王重潤及永泰郡主主壻武延基冬十月辛酉大赦天下改元為長安給復關內三年賜酺三日丙寅魏元忠同鳳閣鸞臺三品

按新書紀十一月壬申武三思罷三思之罷已見嗣聖十

六年十一月壬申此係重出今依舊書紀刪

十一月戊寅改含元宮為大明

宮

十九年

周武氏長安二年

春正月帝在東宮

依唐鑑增

突厥寇鹽州

三月丙戌李迥秀安置山東軍馬檢校武騎兵庚寅突

厥寇并州雍州長史薛季昶持節山東防禦大使以備  
之秋七月甲午突厥寇代州九月乙丑朔日有食之壬  
申突厥寇忻州己卯吐蕃請和冬十月甲辰顧琮薨戊  
申吐蕃寇悉州茂州都督陳大慈敗之甲寅姚元崇同  
鳳閣鸞臺平章事蘇味道韋安石李迥秀同鳳閣鸞臺  
三品十一月甲子相王旦為司徒戊子祀南郊大赦賜  
酺三日十二月甲午魏元忠為安東道安撫大使

二十年

周武氏長

春正月帝在東宮

依唐  
鑑增

三月壬戌朔

日有食之夏四月庚子相王旦罷吐蕃來求婚乙巳以  
早避正殿閏月庚午成均祭酒李嶠同鳳閣鸞臺平章  
事己卯李嶠知納言事秋七月壬寅正諫大夫朱敬則  
同鳳閣鸞臺平章事庚戌檢校涼州都督唐休璟為夏  
官尚書同鳳閣鸞臺平章事九月庚寅朔日有食之丁  
酉敗魏元忠為高要尉冬十月丙寅如神都十二月丙  
戌天下置關三十

二十一年

周武氏長  
安四年

春正月帝在東宮

依唐  
鑑增

丁未作興

泰宮于壽安縣之萬安山壬子天官侍郎韋嗣立為鳳閣侍郎同鳳閣鸞臺三品二月癸亥貶李迥秀為廬州刺史壬申朱敬則罷三月丁亥進封皇孫平恩郡王重福為譙王己亥夏官侍郎宗楚客同鳳閣鸞臺平章事貶蘓味道為坊州刺史夏四月壬戌韋安石知納言事李嶠知內史事丙子如興泰宮赦壽安縣給復一年六月辛酉姚元之罷乙丑天官侍郎崔玄暉為鸞臺侍郎同鳳閣鸞臺平章事丁丑李嶠同鳳閣鸞臺三品壬午

相王府長史姚元之兼知夏官尚書同鳳閣鸞臺三品  
秋七月丙戌左肅政臺御史楊再思守內史甲午貶宗  
楚客為原州都督八月庚申唐休璟兼幽營二州都督  
安東都護九月壬子姚元之為靈武道行軍大總管冬  
十月辛酉姚元之為靈武道安撫大使甲戌判秋官侍  
郎張柬之同鳳閣鸞臺平章事壬午懷州刺史房融為  
正諫大夫同鳳閣鸞臺平章事十一月丁亥天官侍郎  
韋承慶行鳳閣侍郎同鳳閣鸞臺平章事李嶠罷十二

月丙辰韋嗣立罷

欽定續通志卷四